

Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit Namminersorlutik Oqartussat nalunaarutaat

Umiarsualivimmiinnermut akileraarutit pillugit Inatsisartut inatsisaanni nr. 20, 30. oktober 1992-imeersumi kingusinnerusukkut allannguuteqartartumi § 12 aamma § 14, imm. 2 naapertorlugit makku aalajangersarneqarput:

Umiarsualivinni talittarfinnit, kisarfiit ilanngullugit, makkunanga aallareernerup kingorna nalunaarutiginninneq akiliisitsinerlu

§ 1. Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarut samt avatangiisinut aserfallatsaaliuinernullu akiliut umiarsuit akitsuuserneqartussaataasut umiarsualivinnut makkununga tulanneranni imaluunniit taakkua avataanni kisarneranni (umiarsuit kisarsimasut) akiliisinneqassapput:

- 1) Qaanaaq,
- 2) Upernavik,
- 3) Uummannaq,
- 4) Qeqertarsuaq,
- 5) Ilulissat,
- 6) Qasigiannguit,
- 7) Aasiaat,
- 8) Kangaatsiaq,
- 9) Sisimiut,
- 10) Kangerlussuaq,
- 11) Maniitsoq,
- 12) Nuuk,
- 13) Paamiut,
- 14) Narsaq,
- 15) Narsarsuaq,
- 16) Qaqortoq,
- 17) Nanortalik,
- 18) Tasiilaq aamma

19) Ittoqqortoormiit.

Najukkani umiarsualivimmi oqartussat suliassa

§ 2. Umiarsualivimmi oqartussaasoq umiarsualivimmiinnermut akileraarutit pillugit Inatsisartut inatsisaanni nr. 20, 30. oktober 1992-imeersumi kingusinnerusukkut allannguuteqartartumi Naalakkersuisunit suliakkiissutigineqartunik suliaqartussaavoq.

Imm. 2. Suliassat imm. 1 naapertorlugu umiarsualivimmi oqartussaasumut suliassiissutigineqartut, akileraaruseriffik akuersiteqqaarnagu, allanit isumagisassanngorlugit umiarsualivimmi oqartussaasoq piginnaatitsisinnaanngilaq.

Imm. 3. Nalunaarut manna naapertorlugu umiarsualivimmi oqartussaasup aalajangiineri Akileraartarnermut ingerlatsivimmut naammagittaalliutigineqarsinnaapput.

§ 3. Umiarsuarmi aquttoq, imaluunniit inuttaq akisussaasuusoq alla, imaluunniit umiarsuarmut tuniniaasoq (agenti), umiarsuup umiarsualivimmiit aallannginnerani umiarsualivimmi oqartussaasup erseqqinnerusumik innersuussinera malillugu umiarsuup suussusaa, umiarsuup usitussusaa (tonsini tamakkiisuni uuttorlugu, naalisarlugu BT), umiarsualivimmiinnermi ullup unnuallu aallartinnerisa amerlassusaat umiarsualivimmi oqartussaasumut ilumoorluinnarluni uppersaalluni nalunaarutigissavaa kiisalu akitsuutit akiliutillu naatsorsorneqartut akuerissallugit, taamaattoq takuuk imm. 3. Umiarsualivimmi oqartussaasoq ilumoorluinnarluni uppersaalluni nalunaarutip tiguneqareernerata kinguinnguutigut imm. 1-imi akitsuutinut akiliutinullu naatsorsorneqartunut taakkununga akiligassamik akileeqqusinermigut akissuteqassaaq.

Imm. 2. Imm. 1-imi ilumoorluinnarluni uppersaalluni nalunaarummut tunniunneqartumut peqatigitillugu umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarut kiisalu avatangiisinut aserfallatsaaliuinernullu akiliut akiligassanngussaaq. Imm. 1-imi taaneqartutut akiligassamik tigusaqarnerup kingorna akitsuutit akilernerqartussat akiliutillu akilersinneqartussat ullut 14-it qaangiutsinnagit umiarsualivimmi oqartussaasumut akilernerqassapput, taamaattoq takuuk imm. 3. Taamaattoq akiligassap tigusarnerut ulloq akiliiffissatut ullumut naleqqiullugu kingusinnerusumi inissinneqarsimasinnaanngilaq.

Imm. 3. Umiarsuarnut umiarsualivimmi ataatsimi arlalinniluunniit aalajangersimasumik angalasartunut, allatut akileeriaaseqarnissaq pillugu akileraaruseriffimmut isumaqatigiissuteqartoqarsinnaavoq, aamma takuuk § 4.

§ 4. Umiarsuit suliffeqarfimmit allatut nalunaaruteqariaaseqarnissamik akileeriaaseqarnissamillu akileraaruseriffimmut isumaqatigiissuteqarsimasunit pigineqartut imaluunniit attartorneqartut, § 3-miunngitsoq, kisianni taamaattoq § 5, imm. 2-mi, pineqartunut ilaatinneqassapput.

§ 5. Umiarsualivimmi oqartussaasup § 3, imm. 1 naapertorlugu qaammatip siuliani ilumoorluinnarluni uppersaalluni nalunaarutinut takussutissiat kingusinnerpaamik qaammatip tulliaata 15-iani akileraaruseriffimmut nassiutissavai. Takussutissiamut immersugassaq akileraaruseriffimmit tamatumunnga atugassatut suliarineqarsimasooq atorineqassaaq. Takussutissiamut ilumoorluinnarluni uppersaalluni nalunaarutit assilineri ilanngunneqassapput. Peqatigisaanik umiarsualivimmi

oqartussaasup akitsuutit akiliutillu qaammatip siuliani tiguneqartut akilissavai. Umiarsualivimmi oqartussaasoq aningaasanik akilernerqanngitsunik sunniuteqarluartumik akiliisitsiniarnissamut pisussaaffeqarpoq, aammattaarlu akileraaruseriffiup tamatuma kingorna pisassanik akiliisitsiniarnissaa siunertaralugu akilernerqarsimangitsut akileraaruseriffimmut nalunaarutiginnissaannik pisussaaffeqarluni.

Imm. 2. Suliffeqarfiit § 4-mi taaneqartutut akitsuutit akilernerqartussat aammalu akiliutit akilersinneqartussat ataatsimoortillugit qaammatikkaartumik naatsorsortassavaat aammalu naatsorsukkat nassiuttassallugit kiisalu akitsuutit akilernerqartussat aamma akiliutit akilersinneqartussat kingusinnerpaamik qaammatip tulliaa 15-iani akileraaruseriffimmut akilissallugit.

Kukkunersiuisup uppernarsaalluni nalunaarutaa, ukiumi ataatsimoortumik nalunaarutiginninnernut akiliisitsinernullu takussutissiaq ilanngullugu

§ 6. Suleriaasissat pilersinneqarsimasut, umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutininik kiisalu avatangiisinut aserfallatsaaliuinnermullu akiliutininik akiligassiinerit, naatsorsuereernermi akiliisitsinerit allaffissornikkullu aqutsinerup, umiarsualivimmiinnermut akileraarutit pillugit Inatsisartut inatsisaat nr. 20, 30. oktober 1992-imeersoq kingusinnerusuklut allannguuteqartartumi aalajangersakkanut aammalu nalunaarummi matumani aalajangersakkanut naapertuuttumik, ingerlanneqartarnissaannik qulakkeerinerat pillugu umiarsualivimmi oqartussaasup kukkunersiuisua qaammatisiutit malillugit ukiut naareernerit tamaasa akileraaruseriffimmut uppernarsaalluni nalunaaruteqartassaaq.

Imm. 2. Uppernarsaalluni nalunaarummik imm. 1-imi taaneqartumik nassiussinermi ukiumi nalunaarutiginninnernut ataatsimoortunut aammalu akitsuutinut akiliutinullu naatsorsuereernermi akiliisitsinernut takussutissiaq umiarsualivimmi oqartussaasup ilannguttassavaa.

Kommunit sumiiffinnik aamma akiliutit annertussusaannik nalunaarutiginninnerat

§ 7. Avatangiisinut aserfallatsaaliuinnermullu akiliutininik tamatuma kingorna akiliisitsiniarnissaq siunertaralugu, ukiumut aggersumut sumiiffiit attuumassuteqartut tassungalu atasut akiliutit annertussusissaat ukiup siuliani kingusinnerpaamik ulloq 1. oktobari kommunit akileraaruseriffimmut nalunaarutigissavaat, taamaattoq takuuk imm. 2.

Imm. 2. Imm. 1-imi akiliutit annertussusissaat nalunaarutigineqartut niunermini ataatsimi ilaasumut ataatsimut annerpaamik 50 kr.-nik annertussuseqarsinnaapput. Ilaasut niunersut niunnginnersulluunniit apeqqutaatinngit nunamut niunermini ilaasut umiarsuarmiittut amerlassusaannut akiliutissaq akileqquneqassaaq.

Kommunit akiliutinit isertitanik atuinerat

§ 8. Kommunit avatangiisinut aserfallatsaaliuinnermullu akiliutinit isertitat, akiliutip siunertaanut, tassaasumut najukkami nunallu immikkoortuani takornariaqarnermut tunngavissiiinnissaq siuarsaanissarlu, kiisalu tamatumani sunniutaanerlussinnaasunik pakkersimaarnissaq, naapertuuttumik taamaallaat atorsinnaavaat.

Imm. 2. Akiliutinit isertitat kommunit ilaatigut pitsaaliuinnermut iliuusissanut, atortorissaarutini pioreersunik aserfallatsaaliuinnermut imaluunniit pitsanngorsaannermut kiisalu atortorissaarutini nutaanik sanaartornissamut atorsinnaavaat. Taakkua assersuutigalugu tassaasinnaapput tassaasinnaapput umiarsualivimmi, talittarfeqarfimmi, niusarfinni puttasuni il.il. imaluunniit eqqaanni imaluunniit sinerissami imaluunniit pinngortitami niusarfinni akulikitsumik orninneqartartuni takornariartarfiit imaluunniit perusersartarfiit.

Imm. 3. Sumiiffiit avataanniittut avatangiisinut aserfallatsaaliuinnermullu akiliummik akiliisitsinissaq siunertaralugu, takuuk § 7, kommuninit toqqarneqartut aammalu akileraaruseriffimmut nalunaarutigineqartut, sumiiffik takornariat amerlinerannit sunnerneqarsimappata, akiliutinit isertitat iluaqutigisinnaavaat.

Imm. 4. Kommunit isertitanut aammalu aningaasartuutitut taakkunannga isertitanit matussuserneqartunut naatsorsuutini allattuissapput. Kommunit naatsorsuutaannik saqqummiinnermi akiliutinit isertitat atorneqarnerat nassuiarneqassaaq.

Pillaanissamut aalajangersakkat

§ 9. Piaaraluni, imaluunniit mianersuaalliorujussuarluni § 3, imm. 1, 1. imm., § 5, imm. 1, 1., 4. aamma 5. imm., § 5, imm. 2, imaluunniit § 6, imm. 1-imik unioqqutitsisoq, allatulluunniit iliuuseqartoq akiliisitsinermik pineqaatissinneqassaaq, tassalu inatsisit allat malillugit allatut pineqaatissiisoqartussaasimangippat.

Imm. 2. Unioqqutitsisoq aktiaatileqatigiiffuppat, piginneqatigiiffuppat, piginneqatigiilluni ingerlatseqatigiiffuppat assigisaanilluunniit, ingerlatseqatigiiffik taamatut akiliinissamik akisussaatinneqarsinnaavoq.

Atuutilersitsinnermut, ikaarsaarnermut atorunnaarsitsinnermullu aalajangersakkat

§ 10. Nalunaarut manna ulloq 21. december 2023 atuutilerpoq.

Imm. 2. Peqatigisaanik umiarsualivimmiinnermut aamma umiarsuit takornarianik angallassissutit ilaasunik angallassinerrannut akileraarutit pillugit nalunaarut nr. 5, 7. marts 2003-meersoq atorunnaarsinneqarpoq.

Imm. 3. § 7, imm. 1-imi akileraaruseriffimmut nalunaarutiginninnissamut killigititaaq, 2023-mi ulloq decembarip aallaqqaataanut allanngortinneqarpoq.

Namminersorlutik Oqartussat, ulloq 20. december 2023

Erik Jensen (atsior.)

Aningaasaqarnermut Akileraartarnermullu Naalakkersuisoq

/ Nikolai S. Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut